

Dielangana dia Meji pa Lumu Luimpe lua Yone

No. 25

Tshishikidilu tshia Kupita kua Yehowa

Dinanga dia Yesu

Diambedi disanka dia Kupita kua Yehowa kadiyi dianze kulua, Yesu wakamanya ne, Diba dianyi dia kumuka pa buloba bua kuya kudi Tatu diakufika, yeye mumane kusua bandi mene bakadi pa buloba, wakabasua too ne kunshikidilu (Yone 13:1).

Mukelenge Yesu wakaya ku lufu pa mutshi mutshiakane mu dinanga diende bua Tatu wende, mu dinanga bua bantu bende Bena Isalele, mu dinanga bua ba pa buloba bujima, ne mu dinanga bua wewe biebe mubadi wanyi.

Milonda ya bantu babi kayikadi mua kusuika Mukelenge wa butumbi ku mutshi mutshiamakane, kadi dinanga bua bualu buetu wakamuvuija muena kanyinganyinga. Yesu wakakenga bikole be ku bianza bia Nzambi bua bubi buetu. Mufuki wetu wakakenga ku bianza bia bantu bakadi bafukibua bua bualu buende (Kolosai 1:16).

Yesu mumane kusua bandi mene bakadi pa buloba, wakabasua too ne kunshikidilu.

Yesu udi wowesha bayidi bandi makasa

Pakadibo badia, diabololo mumane kubueja munda mua Yudasa Isakaliote, muana wa Simona bualu bua kutungila Yesu tshitungu; pakamanya Yesu ne, Tatu wanyi wakufila bintu bionso mu bianza bianyi, nakufuma kudi Nzambi, nempingane kudi Nzambi; Yesu wakabika ku mesa, wakavula bivualu biandi, wakangata dituaya, wakadijingiladi. Pashishe yeye wakela mayi mu dilonga, wakabanga kuowesha bayidi makasa ne kuakupula ne dituaya diakadiye mudijingile (Yone 13:2-5).

Dituku dikuabo pakadi Yesu ne bayidi bandi dikumi ne babidi, bayidi babidi bakalomba Mukelenge Yesu bua kubateka kumpala kua bayidi bakuabo. Bayidi dikumi bakadi ne tshiji ! Kadi Yesu wakabambila ne, “Wasua kulua munene munkatshi muenu neikale muena mudimu wenu; wasua kuikala pamutu penu neikale muena mudimu wenu; wasua kuikala pa mutu penu neikale mupika wa buonso buenu. Muana wa muntu kabidi kakuluila bua bantu bamukuatshile mudimu, wakuluila bua kubakuatshila mudimu, ne bua kufila muoyo wandi bua kupikula nawu bantu ba bungi” (Mako 10:43-45).

Petelo udi wambila Yesu ne, “Too ne tshiendelele wewe kungoweshi makasa”

Nunku yeye wakalua kudi Simona Petelo. Petelo wakamukonka ne, Mukelenge, wewe udi ungowesha meme makasa, anyi ? Yesu wakamukudimuna ne, Wewe kuena mumanye bundi ngenza katataka, kadi neujingulule kunyima. Petelo wakamuambila ne, Nansha, too ne tshiendelele wewe kungoweshi makasa. Yesu wakamuandamuna ne, Bingikala tshiyi mukuoweshe, kuena nanyi luseke lumue. Simona Petelo wakamuambila ne, Mukelenge, kungoweshi anu makasa anyi nkayawu, ungoweshe kabidi bianza ne mutu. Yesu wakamuambila ne, Udi mumane kuowa pambidi, udi anu ne bua kuowa ku makasa, mubidi wonso udi mutoke; nuenu nudi batoke, kadi buonso buenu kanuena nunku. Yeye wakamanya wamutungila tshitungu; ebu mbualu buakuambidileye ne, Buonso buenu kanuena batoke (Yone 13:6-11).

Yesu wakayisha bayidi bandi dilesona dinene ku tshienzedi tshiende - bua kuikala bena bapuekele ne bua kusuangane. Mukanda wa Nzambi udi wamba ne, “Kudisua kua muntu nekumupuekeshe, kadi udi ne mutshima mupuekele neapete buneme” (Nsumuinu 29:23). Mukelenge Yesu wakatushila tshilejilu bua tuetu tumulonde mu makasa ende.

Mukelenge Yesu wakayisha bayidi bende dilesona dinene dikuabo. Yeye wakabambila ne, “Udi mumane kuowa pambidi, udi anu ne bua kuowa ku makasa, mubidi wonso udi mutoke; nuenu nudi batoke, kadi buonso buenu kanuena nunku” (Yone 13:10). Yudasa muena tshitungu, kakadi mutoke, yeye wakadifila kudi Satana bua kufila Yesu mu bianza bia bakuidi banene. Bena Kilisto, badi bena ditabuja, badi bauvuibua mu mashi a mushinga mukole a Yesu, Muana wa Mukoko wa Nzambi. Mupostolo Petelo wakafunda ne, “Nuakapikudibua ku mashi a mushinga mukole, bu a muana wa mukoko kayi ne tshilema ne kayi ne ditoba, ku mashi a Kilisto mene” (1 Petelo 1:19).

Kuowa ku makasa

Bayidi balelela a Mukelenge badi batoke. Muena ditabuja, palueye kudi Yesu bua lupandu, udi upeta muoyo wa tshiendele. “Yeye muine wakatutuadila malu mabi etu mu mubidi wandi ku mutshi mutshiamakane” (1 Petelo 2:24). Mukelenge Yesu wakamana kufuta dibanza diandi, yeye kena mumanye mua kujimija lupandu luandi ! (Yone 5:24).

Kadi bantu ba Nzambi badi ne kuowa ku makasa bualu. Katuena tuenda mu njila wa Nzambi misangu yonso ! Mukanda wa Nzambi udi wamba ne, “Bituamba ne, Katuena ne mibi, tudi tudidinga, ne bushuwa kabuena munda muetu. Bituatonda mibi yetu, yeye udi wa kueyemenyibua ne udi ne buakane bua kubuikidila mibi yetu, ne bua kutulengesha ku malu mabi onso” (1 Yone 1:8,9).

Bena kuitabuja bonso badi ne dibala anyi diunvua dia Mukanda wa Nzambi bualu. Mukanda wa Nzambi udi wamba bua kulengesha ne kuvua kua mayi ne diyi dia Mukelenge (Efeso 5:26). Kunyima kua dipatuka dia Yudasa, Mukelenge wakambila bayidi bende ne, “Katataka nudi balengeshibua bualu bua diyi dinakunuambila” (Yone 15:3).

Satana udi ubuela mu Yudasa

Bulelela, bulelela, ndi nuambila ne, Witabuja unatuma neangitabuje meme; wangitabuja meme neitabuje wakuntuma. Pakamba Yesu nunku, mutshima wandi wakanema bujitu, wakamba ne, Bulelela, bulelela, ndi nuambila ne, Umue wenu neantungile tshitungu” (Yone 13:20,21).

Mukelenge Yesu wakanyingala bikole. Yudasa wakadi nende bu umue wa bapostolo bende. Matayo udi utuambila ne, “Yudasa Isakaliote wakaya kudi bakuidi banene ba Nzambi, wakamba ne, nenumpe tshinyi, mmufile mu bianza bienu ? Bakidikisha bujitu bua bitupa bia mpalata makumi asatu, bakamupabi” (Matayo 26:14,15). Kunshikidilu kua Yudasa kuakadi bikole, yeye wakadiowa (Matayo 27:5). Satana udi mfumu mubi !

Yesu udi upesha bayidi bandi mukenji mupia-mupia

Bana banyi bakese, nengikale nenu tshitupa tshipi. Nenunkebe, kadi bu munakambila Bena Yuda ne, Kanuena bamanye mua kulua kunaya; katataka ndi nuambila nuenu muomumue. Ndi nuelela mukenji mupia-mupia ne, Nusuangane; nusuangane bu munakunusua. Bua bualu ebu bantu bonso nebamanye ne, Nudi bayidi banyi, binuasuangana nunku (Yone 13:33-35).

Pakadi Yesu pepi kushiya bayidi bandi, yeye wakabambila bualu bua mukenji wende mupia-mupia misangu ibidi (Yone 13:34. Yone 15:12). Yeye wakamanya mitshima ya bayidi bende bu mudiye mumanye mitshima yetu. Bena Kilisto badi ne bua kunangangane !

***“Mu dinanga dia bana benu ba mu Kilisto nunangangane,
muntu ne muntu; mu buneme muntu ne muntu
ateke mukuabo kumpala”
(Lomo 12:10).***